



Fasnacht 2020

Sujet: **Weisch no...???**

Wer kenn's nit s` Rad vo dr Zyt lauft
wirsch pensioniert drby bisch erscht tauft
hüt modern und morn scho alt
so schnell lauft Zyt so isch es halt
au mir bruche bald e Rollator oder Gehstock
früener hämer Purzelbäum gschlage in Woodstock
mache drum jetzt Fasnacht, nei nit als Pippis
sondern als usgflippti, bunti Hippies
und händ e Reis in d`Vergangeheit unternoh
luege zrug und froge: **Weisch no...???**

Willsch hüt Milch, muesch in d` Migros go
früener isch dr Milchmaa no heime cho
mit sim wiss/blau Charre
isch er in Prattele umegfahre
vo Huus zu Huus das isch dr Hit
bringt er die feine Sache mit

Firestone, Bombardier oder Persil
es gäbt au no anderi Bispiel
die si alli nümme vorhande
sogar e Landi isch mol z` Prattele gstande

Au sportliche Aläss si verschwunde
s` Grümpeli isch in dr Sandgruebe unte
uf dr Hexmatt sind's no richtigi Parties gsi
aber ebe das isch jetzt au verby
oder d` Velofahrer mit ihrem Grossalass
mir finde das hüt no krass
mitte in Prattele isch gsi dr Start
genau mir meine d` Warteberggrundfahrt

Mir händ au anderi Aläss gfunde
wo's leider nümme git, sie sind verschwunde

dört wo's hüt leider nümme goht
vom Nomidaag a bis Zobe spot
het's im Geisswald viele Gäsch
isch jo klar s`isch Waldfesch

Wenn het me dr neuscht Suuser chönne probiere?
Jo jetzt muesch nit lang studiere
dr Maa het Durscht und d`Frau isch e Wildi
hejo den isch Zyt für d'Suuserchilbi

Dr Finger innestecke, ummedreie bis es quält
so hesch früener Nummere gwählt
mitem Telefon ummelaufe isch nit gange
die sind an dr Wand ghange
bisch modern gsi, bisch besser dra
hesch öbe 5 Meter Kabel gha
bi dr Kabine isch ohni Münz nüt gloffe
usser am Barfi dört hesch di zum Date troffe

Mit de Fernseh isch es die gliichi Sach
die si nümme dick und schwer, sondern flach
Fotiapparat sind schlecht usgstatte
Musik hämer gloost ab dr Langspielplatte
für unterwegs dr leschti Schrei
git's Walkman, hüt sind's MP 3
Game Boy hämer gspielt bis zur Hypnose
ab em Kasettli hämer dörfe Kasperli loose
Play Station hämer au nit kennt
das hämer no „Eile mit Weile“ gnennt

Mir luege au zu de Schlecksache ganz fix
Raider heisst hüt Twix
was au hüt nümme chasch ha
sind Zuckerperlechetti oder Bazooka
au dr rundi 5er Mocke
tuet hüt als 20er verlocke
was es aber immer no git ohni Ghetz
sind Brausepulver Double Dip, Tiki oder PEZ
Schleckmuschle, Cola Fröschli oder Carambar Caramel
die findisch au no am Kiosk im Gstell

Bim nächschte Värs han ich viel glitte
ha nämlich mit dr Greta gstritte
sie meint dr Klimaschutz muess au vorcho
drum han i halt dr Winter gno
Schneeballschlacht, Schlittle hämer dörfe erläbe
dr einzig Schneemaa hüt isch a dr Fasnacht und dä dörf witerläbe

Au an dr Fasnacht mir sind betroffe
isch früener es bitzeli meh gloffe
immer am Zischtig so genial
hämer gha dr Chluriball
den jede Tag offe dr grossi Star

jo mir meine d`Chueli Bar
was wieder chunnt das tuet uns gfalle
no meh Fasnacht in dr Dorfturnhalle

Jetzt isch fertig mit dr Vergangeheit, Digge
mir möchte wieder in d'Zuekunft blicke
au im 2021 wämer e Teil si vom Fasnachtschueche
doch ei Wunsch hätte d`Dorfplatzrueche
er handelt vo dr Blagettevernissage
bitte nit nomol so e Blamage
drum schriebe mir das in dem Värs
gnueg Bier am Apéro, jo das wärs.

